



XUNTA DE GALICIA

MEMORIA XUSTIFICATIVA DO CONVENIO DE COLABORACIÓN ENTRE A ENTIDADE PÚBLICA EMPRESARIAL AUGAS DE GALICIA E A FUNDACIÓN SANTIAGO REY FERNÁNDEZ-LATORRE PARA A DIFUSIÓN E DIVULGACIÓN DE INFORMACIÓN EN TEMAS ENCAMIÑADOS Á CONCIENCIACIÓN DE ESCOLARES SOBRE O USO RESPONSABLE DA AUGA

1.- ANTECEDENTES

I.- A Constitución española recoñece no seu artigo 34.1 o dereito de fundación para fins de interese xeral.

Neste sentido, e tal e como recolle a exposición de motivos da Lei 12/2006, do 1 de decembro, de fundacións de interese galego, a institución das fundacións destaca como un instrumento adecuado de participación da sociedade galega na acción social, cultural, científica e doutros ámbitos, o que se manifesta como unha expresión creativa do ánimo altruísta e solidario dos seus membros. En definitiva, son entidades non lucrativas cun papel propio e diferenciado dentro do marco do Estado social e democrático de dereito. Así, cómpre recoñecer a importancia vital das fundacións neste eido, como medio fundamental de coparticipación e de colaboración da cidadanía no sector público.

Por esta razón, a Comunidade Autónoma de Galicia entende que se debe estimular a iniciativa privada na realización de actividades de interese xeral, prestándolle apoio e cobertura ao protagonismo que a sociedade reclama e exerce a través dunha variada gama de entidades sen ánimo de lucro, para o cal se flexibiliza o seu réxime xurídico nos aspectos que máis adiante se relacionan.

En definitiva, as fundacións desempeñan un papel relevante para promover a participación nos diferentes eidos sobre os que estas poden actuar, pois, desenvolven unha labor de intermediarios respecto de cantos non están en condicións de coñecer as actividades desenvoltas nos referidos campos directamente, papel que se acrecenta con respecto a acontecementos que pola súa entidade poden afectar a todos e por elo acadan unha específica resonancia social.





XUNTA DE GALICIA

II.- A Entidade pública empresarial Augas de Galicia pretende contribuír a que os cidadáns dispoñan da maior e mellor información posible e ao mesmo tempo transmitir os valores que informan a actuación pública, impulsando para iso as condicións necesarias para o exercicio da liberdade de expresión e o dereito á información, e contribuír, deste xeito, a formación e existencia dunha opinión pública libre e democrática.

III.- A "Fundación Santiago Rey Fernández-Latorre", declarada de interese cultural e galego por ordes das consellerías de Presidencia e Administración Pública de 27/11/1997 e Cultura, Comunicación Social e Turismo de 16/01/1998, ten como obxecto social, entre outros, concertar coa Universidade, a Administración Pública e as entidades financeiras a realización de programas de investigación, cursiños, seminarios e conferencias que sexan de interese para as empresas de comunicación social e artes gráficas galegas. Para a realización de tales finalidades pode desenvolver, na medida dos seus medios económicos e de conformidade cos programas concretos que, en cada caso aprobe o seu Padroado, todas as actividades que estime oportunas e, de forma especial, organizar cursos, conferencias, congresos, simposios, coloquios e sesións de estudo e investigacións sobre temas e problemas relacionados coa cultura e a comunicación social.

Segundo recollen os seus estatutos, o obxectivo da Fundación Santiago Rey Fernández-Latorre é "fomentar o coñecemento e difusión da cultura, especialmente a través dos medios de comunicación en calquera dos seus soportes, e contribuír ao estudo, investigación, defensa e creación de medios de comunicación en Galicia".

As actividades da Fundación encamíñanse á posta en marcha de programas educativos e formativos relacionados coa comunicación. Esa labor realizase nos diversos niveis da ensinanza, incluída a formación de calidade para profesionais dos medios e da educación, e concrétese en iniciativas diversas que van dende a organización de foros e conferencias á edición de publicacións especializadas.

Asemade, no marco do papel que de deben xogar nunha sociedade democrática e plural as fundacións de interese cultural, a Fundación Santiago Rey Fernández-Latorre, nas súas actividades inclúe tanto actuacións da administración autonómica, en xeral, como da Entidade pública empresarial Augas de Galicia, por considerar de grande importancia á concienciación de escolares sobre o uso responsable da auga así como calquera outra acción e/ou programa da entidade pública que produza efectos sobre a calidade de vida dos cidadáns galegos.





XUNTA DE GALICIA

2. RAZÓNS DE OPORTUNIDADE E XUSTIFICACIÓN DA NON CONCORRENCIA

A Entidade pública empresarial Augas de Galicia considera a educación e sensibilización sociais como unha das ferramentas máis importantes na consecución dos obxectivos da Directiva 2000/60/CE, do Parlamento Europeo e do Consello, de 23 de outubro de 2000, pola que se establece un marco comunitario de actuación no eido da política de augas, coñecida como Directiva Marco de Auga. Obxectivos que esta entidade asume como propios e entre os que cabe destacar, no ámbito de aplicación deste convenio, a protección das augas superficiais continentais, e mais especificamente dos ecosistemas fluviais a través da promoción dun uso sustentable da auga.

Por outra parte, a Fundación Santiago Rey Fernández-Latorre contribúe a facer efectivo a liberdade de expresión e o dereito de información, polo que se aprecia unha coincidencia de intereses entre o dita fundación de interese cultural e os de Augas de Galicia, dada a natureza das súas actuacións, o cal determina a posibilidade de colaboración das distintas partes para atender unha finalidade común.

Por todas estas razóns, coidase xustificada a oportunidade de asinar un acordo para a mellor presentación e divulgación das actuacións públicas nos ámbitos de competencia de Augas de Galicia, segundo se lle asignan no Decreto 32/2012, de 12 de xaneiro, polo que se aproba o seu estatuto (DOG nº 9, de 13.01.2012).

Á vista do exposto, resulta evidente o interese coincidente entre a Entidade pública empresarial Augas de Galicia e a Fundación Santiago Rey Fernández-Latorre para impulsar para a difusión e divulgación de información en temas encamiñados á concienciación de escolares sobre o uso responsable da auga a través da súa organización, o cal, dada a súa posición relevante respecto do seu ámbito de influencia xustifica a non promoción da concorrência.

3. OBXECTIVOS QUE SE PRETENDEN

Difundir e divulgar información en temas encamiñados á concienciación de escolares sobre o uso responsable da auga, a través da difusión nas actuacións da Fundación Santiago Rey Fernández-Latorre.





XUNTA DE GALICIA

Tódalas circunstancias expresadas determinan que proceda a sinatura do convenio, obxecto desta memoria, coa Fundación Santiago Rey Fernández-Latorre.

4. ESTIMACIÓN DE CUSTOS E FINANCIAMENTO.

O importe da actuación que se presenta no obxecto do convenio estímase nun total de cento sesenta e un mil trescentos oitenta euros (161.380,00 €) , segundo a información facilitada polo propia sociedade e reflectida no anexo desta memoria.

A achega económica de Augas de Galicia ascende a un importe máximo de oitenta mil euros (80.000,00 €), con cargo ao seu programa de actuacións, investimentos e financiamento para o exercicio 2018, e o gasto imputarase á conta 219 “Outro inmovilizado inmaterial” do Plan xeral de contabilidade pública de Galicia.

Santiago de Compostela

A directora de Augas de Galicia

Teresa María Gutiérrez López

(documento asinado dixitalmente)





XUNTA DE GALICIA

ANEXO

ORZAMENTO CONVENIO ENTIDADE PÚBLICA EMPRESARIAL AUGAS DE GALICIA - FUNDACIÓN SANTIAGO REY FERNÁNDEZ- LATORRE	
CONCEPTO	CUSTE ESTIMADO (€)
Cobertura periodística. Info " Voz escuela"	68.000,00
Cobertura gráfica	5.750,00
Diseño, fotomecánica, pranchas	27.980,00
Impresión	47.650,00
Xestión contidos	12.000,00
CUSTE TOTAL	161.380,00

